

VENDIM
Nr.1, datë 4.3.2010

PËR PËRCAKTIMIN E RREGULLAVE TË HOLLËSISHME PËR SIGURIMIN E TË DHËNAVE PERSONALE

Mbështetur në ligjin nr.9887, datë 10.3.2008 “Për mbrojtjen e të dhënave personale”, vendimeve të Kuvendit të Shqipërisë nr.211, datë 11.09.2008 “Për zgjedhjen e Komisionerit për Mbrojtjen e të Dhënave Personale” dhe nr.225, datë 13.11.2008 “Për miratimin e strukturës, organikës dhe kategorizimit të pozicioneve të punës të zyrës së Komisionerit për Mbrojtjen e të dhënave Personale”, dhe në zbatim të detyrimeve që më ngarkon pika 5 e nenit 27 të ligjit të lartpërmendur,

VENDOSA:

Marrjen e masave organizative dhe teknike për mbrojtjen e të dhënave personale që përpunoni:

Për përmbushjen e këtij detyrimi duhet:

1. Të dhënat personale të mbahen të sigurta dhe të mos keqpërdoren apo korruptohen në ndonjë mënyrë. Siguria nuk ka të bëjë vetëm me marrjen e masave fizike, por gjithashtu ka të bëjë me organizimin e punës, në mënyrë të tillë që rreziku të minimizohet. Në rast bashkëpunimi me përpunues, kontrolluesi duhet të zgjedhë një përpunues i cili paraqet aftësi profesionale (për shembull mund të jetë i certifikuar), të tilla që ndër të tjera të përmbushë detyrimet kontraktore lidhur me zbatimin e masave të sigurisë teknike dhe organizative.

2. Të ndërmerrni të gjithë hapat e nevojshëm dhe të garantoni që stafi të jetë i ndërgjegjësuar dhe i trajnuar rreth nevojës së sigurisë dhe përforsimit të saj.

3. Niveli i sigurisë të konsiderojë natyrën e të dhënave të cilat përpunohen.

4. Të konsideroni vlerën e të dhënave personale dhe dëmet që mund të shkaktohen nga përdorimi i tyre nga persona të paautorizuar, nga humbja ose shkatërrimi.

5. Të konsideroni mundësitë teknologjike dhe kostot e kërkuara për t'i implementuar ato.

6. Të bëni kontroll të dyfishtë të identitetit të personit që kërkon të shikojë të dhënat personale.

7. Të siguroheni për identitetin e individëve përpara se t'i lejoni që t'i shikojnë të dhënat pasi ata kanë të drejtë të kërkojnë dhe shikojnë të dhënat e tyre.

8. Të mos nxirren jashtë zyrës në asnjë rast kompjuterë, lap-top apo pajisje të tjera që përmbajnë të dhëna personale dhe të mos lihen ato në vende të pasigurta, në automjete, lokale etj., pa u siguruar në fshirjen apo shkatërrimin e të dhënave.

9. Të mos mbani në monitor të dhëna personale kur është i pranishëm një person i paautorizuar dhe sidomos jo në vende publike.

10. Të sigurohet që modifikimi, korrigjimi, fshirja dhe transferimi i të dhënave personale dhe veprime të tjera në lidhje me të dhënat personale të regjistrohen dhe të dokumentohen.

11. Për sigurinë e të dhënave të kenë përparësi në blerje pajisjet teknike që ofrojnë elemente të përshtatshme sigurie, pasi pajisjet e reja kompjuterike kanë të inkuorporuar pajisje sigurie.

12. Sistemi të garantojë shërbimin në mënyrë të vazhdueshme. Kjo do të thotë që të dhënat të jenë në dispozicion sipas metodave dhe autorizimeve në varësi të qëllimit të përcaktuar.

13. Të tregohet kujdes i veçantë në transmetimin e të dhënave personale dhe përpunimin e tyre në rrjet duke marrë masat e nevojshme për të garantuar që komunikimi të jetë i sigurt dhe të shifrohet, aty ku është i nevojshëm.

14. Të përcaktoni një politikë sigurie të qartë, në rast cenimi të sistemit.

15. Metodot e rimëkëmbjes të aktivizohen në kohë të përshtatshme.

16. Të dhënat të mbrohen duke verifikuar përdoruesin dhe duke i lejuar akses vetëm individëve të autorizuar.

17. Të instaloni dhe të përditësoni software-t e antivirusëve (barrierat mbrojtëse) në të gjitha pajisjet kompjuterike.

18. Subjektit të të dhënave t'i jepni vetëm informacione të nevojshme për të.

19. Të përdorni fjalëkalime në aksesin e të dhënave dhe t'i ndryshoni ato periodikisht.
 20. Të përcaktoni një politikë të qartë privatësie.
 21. Të përdorni vetëm kompjuterët për të cilët jeni autorizuar për kryerjen e detyrës suaj funksionale.
 22. Asgjësoni çdo të dhënë personale të panevojshme që gjendet në ambientet tuaja të punës pas kryerjes së veprimeve nga subjekti i të dhënave.
 23. Të informoni Komisionerin për çdo dhunim të mundshëm derisa mund të ndërhyjë për të të mbrojtur.
- Janë përgjegjës për zbatimin e kërkesave të këtij vendimi të gjithë kontrolluesit publikë dhe privatë.
- Ky vendim hyn në fuqi menjëherë dhe botohet në Fletoren Zyrtare.

KOMISIONERE
Flora Çabej (Pogaçe)